

Il problem catalan ord optica svizra

Discussiun publica a l'Universitad da Turitg

DA GUIU SOBIELA-CAANITZ

■ **L'onn passà han las medias svizas rapportà bler da la Catalugna, quel pajais da 7,5 milliuns olmas situà en la Spagna dal nordost. Ma dapi Bu-maun cumpara ses num mo pli darar en las lingias grossas.**

I buglia tutti-na bler a sid da las Pireneas. Ils 23 da favrer en il parlament spagnol, durant il «Debate sobre el estado de la nación», ha primminister Mariano Rajoy punctuà puspè, en connex cun la Catalugna, ch'el n'acceptia mai da metter en dumonda l'unitad da la Spagna. Pedro Sánchez, schef da la Partida socialista spagnola, ha sin quai declerà ch'ils separatists catalans hajan «insultà» la memoria da quels umans che han cum batti per la democrazia en Spagna. Il parlamentari catalan Josep Antoni Duran i Lleida ha replitgà crititgond che Rajoy haja fatg squitsch sin la Procura publica spagnola sinaquai che lezza accusa il primminister e dus cusseglieis guvernativs da la Catalugna pervi da l'organisaziun d'in referendum davart l'indipendenza dal pajais. Ma quai n'è betg tut. Ils 26 da favrer ha il «Consejo General del Poder Judicial» (Madrid) relaschà per trais onns derschader San-

tiago Vidal (Barcelona) perquai che lez, en ses temp liber, aveva gidà ad elavurar in project da constituiziun per ina Catalugna independenta. I crescha in-summa la tensiun tranter il stadi e la «comunitat autònoma», e quai adina dapli enfin a la «Diada» (festa naziunala catalana) dals 11 da settember e la renovaziun electorala dal «Parlament de Catalunya» ils 27 da settember, la quala duess confermar la forza da las duas partidas separatisticas. Lezzas sa distinguan però essenzialmain da grup-pas sco la «Lega Nord» o l'«United Kingdom Independence Party» che vulan sortir da l'Uniun europeica. Enturn november 2015 vegn probablmain il pievel spagnol, cun u senza quel da la Catalugna, a renovar ses parlament per ina legislatura nova.

Il Center d'Aarau per la democrazia

Ils problems da la democrazia en Catalugna han interessà in'organisaziun da l'Universitad da Turitg e dal Fond naziunal svizzer che ha survegnì mo in num englais american per punctuar sia finamira globala*: «National Center of Competence in Research» (NCCR Democracy). Lezza organisaziun ha mess ad ir 2007 il Center d'Aarau per la de-

mocrazia (www.zdaarau.ch), ensemen cun lezza citad, cun l'Argovia, la «Fachhochschule Nordwestschweiz» e l'Universitad da Turitg. Il NCCR arranscha ina discussiun publica intitulada: «The Catalan case from a Swiss perspective. Autonomy and sovereignty referendums.» L'occurrenza ha lieu gievgia, ils 5 da mars 2015, 18.00, a l'Universitad da Turitg, Rämistr. 71, auditori KOLF 117. Tschintg personalitads vegnan a far part:

- Eva Saenz Royo, docenta da dretg constituiziun a l'Universitad da Zaragoza;
- Manuel Manonelles, politolog, «Generalitat de Catalunya» (regenza);
- Antoinette Scherz, politologa (Universitad da Frankfurt am Main);
- Nicolas Aubert, giurist e politolog (Center d'Aarau per la democrazia);
- Haig Simonian, politolog e schurnalist, sco moderatur.

L'Universitad da Turitg conferma pia ses grond interess per la Catalugna, naziun europeica senza stadi.

* «'Center' is the preferred spelling in American English, and 'centre' is preferred in varieties of English from outside the U.S.» (The Open University UK).